


Bosna i Hercegovina
Federacija Bosne i Hercegovine
Tuzlanski kanton
Općina Teočak
Općinski načelnik
Broj: 02-11-972/26
Teočak, 31.07.2026. godine



DOKUMENT OKVIRNOG BUDŽETA OPĆINE
TEOČAK ZA PERIOD
2027. – 2029.GODINA

TEOČAK, juli 2026. godine

Sadržaj

Uvod	3
Poglavlje 1 - Srednjoročne makroekonomske pretpostavke i prognoze	4
1.1. Ekonomski rast	4
1.2. Osnovne pretpostavke i ciljevi makroekonomske politike BiH i Federacije BiH	10
u periodu 2026.- 2028. godina	10
Poglavlje 2 - Srednjoročna porezna politika i prognoza direktnih i indirektnih poreza	11
2.1. Indirektni porezi	12
2.2. Direktni porezi	13
Poglavlje 3 - Prihodi budžeta Općine Teočak	14
3.1. Ukupni raspoloživi prihodi	14
3.2. Rizici po projekcije prihoda	18
Poglavlje 4. Struktura potrošnje u javnom sektoru.....	19
4.1. Rashodi Budžeta Općine Teočak	19
4.2. Plaće i naknade troškova zaposlenih.....	21
Poglavlje 5 - Budžetski prioriteti za period 2026.- 2028. godina	23

Dokument okvirnog budžeta (DOB) Općine Teočak za period 2027.-2029.godina

Na osnovu članova 15.,16., 17. i 18. Zakona o budžetima u Federaciji Bosne i Hercegovine („Službene novine Federacije BiH“, broj: 102/13,09/14, 13/14, 08/15, 91/15, 102/15, 104/16, 05/18, 11/19, i 99/19, 25a/22, 7/25 i 6/26), Općinski načelnik d o n o s i

DOKUMENT OKVIRNOG BUDŽETA OPĆINE TEOČAK ZA PERIOD 2027. – 2029. GODINA

Uvod

U skladu sa Zakonom o budžetima Federacije Bosne i Hercegovine izrađen je Dokument okvirnog budžeta Općine Teočak (DOB) koji je dio pristupa Srednjoročnog okvira rashoda za 2027.-2029. godinu. DOB predstavlja preliminarni okvirni nacrt budžeta jedinice lokalne samouprave utvrđene kroz programe budžetskih korisnika, i isti prikazuje projekciju prihoda i primitaka, programske ambicije i budžetske planove za naredne tri godine.

Cilj DOB-a je racionalnija javna potrošnja, uspješnije određivanje prioriteta pri alokaciji javnih resursa, efikasnije korištenje javnih resursa, te da pomogne da se razvije kvalitetnija strateška osnova za srednjoročno planiranje Budžeta i godišnji budžet. Osnova za izradu budžeta zasniva se i na procjeni privrednog razvoja, razvoja socijalnog sektora, makroekonomskih pokazatelja, te prognozi prihoda i rashoda za godine koje su obuhvaćene Dokumentom okvirnog budžeta.

DOB izlaže fiskalnu strategiju i budžetske planove za sljedeće tri godine sa ciljem stvaranja što bolje strateške osnove za pripremu budžeta.

U skladu sa odredbama člana 17. Zakona o budžetima u Federaciji Bosne i Hercegovine, Dokument okvirnog budžeta Općine Teočak za period 2027. -2029.g. urađen je na osnovu sljedećih dokumenata Ministarstva finansija Tuzlanskog kantona:

- Smjernice ekonomske i fiskalne politike TK za period 2026.-2028.godina, broj:02/1-11-16881/26 od 26.05.2026.godine;
- Makroekonomskih pokazatelja za period 2024.-2029. godina Direkcije za ekonomsko planiranje (DEP), mart 2026.godine,
- Revidiranih projekcija prihoda od indirektnih i direktnih poreza općina/gradova Tuzlanskog kantona za 2026.godinu i za period 2027.-2029.godina, broj: 07/1-11-15488/26 od 15.05.2026. godine
- Revidirane projekcije prihoda od indirektnih poreza za 2026., 2027., 2028. i 2029. godinu, broj: 05-11-142-1/26 od 19.05.2026. godine dostavljenih od JU Direkcija regionalnih cesta TK.

Služba za privredu, finansije, prostorno uređenje i Civilnu zaštitu općine Teočak dostavlja Općinskom načelniku prijedlog DOB-a na razmatranje i usvajanje, a kao osnov za pripremu, planiranje i izradu budžeta i finansijskih planova za fiskalnu 2027. godinu.

Dokument okvirnog budžeta (DOB) Općine Teočak za period 2027.-2029.godina

Poglavlje 1 - Srednjoročne makroekonomske pretpostavke i prognoze

Jedan od osnovnih preduslova održivog ekonomskog rasta te povećanja zaposlenosti jeste makroekonomska stabilnost. Makroekonomska stabilnost ostvarit će se efikasnim upravljanjem javnim finansijama kroz dalje unapređenje procesa upravljanja državnim budžetom, fiskalnu konsolidaciju i efikasno upravljanje javnim dugom, jačanje sistema unutrašnjih finansijskih kontrola te razvojem makroekonomske statistike. Ovakva nastojanja Službe za privredu, finansije, prostorno uređenje i civilnu zaštitu moraju imati potporu svih budžetskih korisnika i drugih koji koriste sredstva budžeta Općine Teočak.

U ovom poglavlju riječ je o najnovijim makroekonomskim kretanjima u BiH, Federaciji BiH i Tuzlanskom kantonu, s fokusom na 2026. godinu, kao i o projiciranom makroekonomskom okviru za naredni srednjoročni period. Korišteni historijski podaci, koji su ujedno bili i osnov za izradu makroekonomskih procjena i projekcija, prikupljeni su od svih relevantnih statističkih institucija u zemlji, kao i ostalih relevantnih domaćih i međunarodnih institucija.

1.1. Ekonomski rast

Ekonomska kretanja na području Općine Teočak u trogodišnjem periodu 2027–2029. godine direktno su uslovljena makroekonomskim trendovima na nivou Federacije Bosne i Hercegovine i Tuzlanskog kantona. Planiranje budžetskih okvira zasniva se na projekcijama stabilnog i umjerenog privrednog rasta, uz postepenu stabilizaciju inflatornih pritisaka i očuvanje fiskalne stabilnosti.

U projekciji za 2027. – 2029. godine očekuje se postepeno smirivanje inflatornih pritisaka u Bosni i Hercegovini i konvergencija ukupne inflacije prema stabilnijoj stopi od oko 2,7%, prvenstveno pod uticajem slabljenja eksternih šokova te stabilizacije cijena hrane i energenata na globalnom tržištu.¹ Za razliku od prethodnog perioda, kada su unutrašnji i administrativni faktori uzrokovali značajne revizije projekcija naviše, u posmatranom srednjoročnom periodu predviđa se stabilizacija kretanja cijena, iako domaće tržište i dalje osjeća produžene efekte ranijih strukturnih poremećaja. Ključni unutrašnji rizici i dalje su vezani za kretanja na tržištu rada, gdje su ranija povećanja minimalne plate pokrenula opšti rast prosječnih nominalnih plata, što je stvorilo trajniji pritisak na troškovnu stranu ekonomije i zadržalo temeljnu inflaciju, posebno u uslužnom sektoru, na nešto višoj razini u odnosu na ukupnu inflaciju.

U kreiranju ekonomskih i fiskalnih politika za ovaj trogodišnji period posebna pažnja se posvećuje interakciji između rasta plata i potrošačkih cijena, koja se manifestuje kroz dvosmjernu vezu, odnosno spiralu cijena i plata. Uslijed povišene inflacije iz prethodnih godina, plate su djelimično rasle radi kompenzacije akumuliranog gubitka kupovne moći stanovništva, što je posljedično uvećalo inputne troškove privrednih subjekata i podstaklo zahtjeve za novim prilagođavanjem cijena. Iako intenzitet ovog procesa uzajamnog poticanja nije konstantan i zavisi od niza tržišnih faktora, prelijevanje efekata rasta plata na sektore sa visokim udjelom ljudskog rada i dalje usporava brži pad bazične inflacije, što zahtijeva oprez pri planiranju budžetskih rashoda i kreiranju mjera za očuvanje cjenovne konkurentnosti domaćih proizvoda.

Ovakva dinamika na tržištu rada direktno utiče na ukupnu ekonomsku aktivnost i postavlja jasna ograničenja za naredni period, u kojem nije realistično očekivati rast zaposlenosti po ranijim, visokim stopama jer povećani troškovi rada ograničavaju agresivnije širenje kapaciteta u privatnom sektoru. Sa makroekonomskog aspekta,

¹ Makroekonomske projekcije i ankete o inflatornim očekivanjima, Centralna banka Bosne i Hercegovine (CBBiH)

Dokument okvirnog budžeta (DOB) Općine Teočak za period 2027.-2029.godina

stalni rast nominalnih plata, uz stabilne prilive doznaka iz inostranstva, ostaje primarni oslonac lične potrošnje kao ključnog generatora realnog ekonomskog rasta, koji bi u srednjem roku trebao dosegnuti umjerenu i stabilnu stopu od oko 3,3%. S obzirom na prisutne rizike, fokus fiskalne politike u periodu 2027. – 2029. godine mora biti usmjeren na provođenje strukturalnih reformi koje povećavaju produktivnost rada, čime bi se amortizovali pritisci rasta troškova poslovanja i osigurala dugoročna stabilnost javnih prihoda.

Prema zvaničnim smjernicama ekonomske i fiskalne politike viših nivoa vlasti, u periodu 2027– 2029. godina projicirana je realna stopa rasta bruto društvenog proizvoda (BDP) na nivou Federacije BiH na godišnjem nivou. Pokretači ovog rasta ogledaju se u oporavku domaće tražnje, stabilizaciji izvoza, te realizaciji najavljenih infrastrukturnih javnih radova. Očekuje se da će se stopa inflacije u posmatranom periodu kretati u granicama istorijskog prosjeka (između 2,0% i 2,5% godišnje), što pruža stabilniju osnovu za planiranje tekućih rashoda i prihoda lokalne samouprave.

Trenutno raspoloživi statistički podaci za 2025. godinu ukazuju da je u Bosni i Hercegovini nastavljen trend rasta ekonomske aktivnosti iz prethodne godine. Naime, prema podacima BHAS-a za 2025. godinu u Bosni i Hercegovini je nastavljen trend rasta BDP, vanjskotrgovinske robne razmjene, javnih prihoda ali i inflacije u poređenju sa prethodnom godinom. Kada je u pitanju BDP, prema trenutno raspoloživim preliminarnim statističkim podacima BHAS-a (statistika nacionalnih računa, kvartalne vremenske serije) za 2025. godinu procjenjuje se da je stopa realnog ekonomskog rasta u odnosu na prethodnu godinu iznosila 2,1%², što je identično procjeni DEP-a u osnovnom scenariju. ³Ako se pažljivije posmatra struktura ekonomskog rasta u 2025. godini može se zaključiti da je domaća tražnja kroz povećanje potrošnje i investicija predstavljala glavni oslonac rasta, dok je doprinos trgovinskog bilansa bio blago negativan. Ako se ima u vidu zastupljenost ukupne finalne potrošnje u strukturi BDP-a od oko 85%, može se konstatovati da je stopa rasta iste od 2,2% i doprinos ekonomskom rastu od 1,9 p.p predstavljala ključni nosilac rasta u zemlji.

Detaljnije posmatrano, prema procjeni DEP-a rast privatne potrošnje u Bosni i Hercegovini iznosio 2% uz doprinos rastu 1,4 p.p. Ovaj rast privatne potrošnje posljedica je povećanju plata i penzija, te porasta priliva doznaka građana iz inostranstva. S druge strane, nešto viši nivo javnih rashoda na svim nivoima vlasti s ciljem zaštite životnog standarda građana u sklopu borbe protiv inflacije bio je ključni razlog povećanja javne potrošnje od 2,8% uz pozitivan doprinos ekonomskom rastu od 0,5 p.p. Vrijedi istaći da su ova povećanja potrošnje ostvarena unatoč povećanju inflacije koja je u 2025. godine iznosila 4,0% što je nešto viši nivo cijena u odnosu na prethodnu godinu.

Pored potrošnje, u Bosni i Hercegovini u 2025. godini nastavljen je i trend rasta ukupnih investicija od 7,3% u odnosu na prethodnu godinu pri čemu je pozitivan doprinos istih u ekonomskom rastu iznosio 1,9 p.p. Međutim, prilikom interpretacije doprinosa ukupnih investicija u strukturi ekonomskog rasta u Bosni i Hercegovini potreban je određen nivo opreznosti obzirom da se statistički posmatrano u okviru investicija nalaze i zalihe. Ako se detaljnije posmatra struktura investicija u Bosni i Hercegovini može se zaključiti da su investicije u mašine i opremu ostvarile dvocifren rast, dok je u okviru građevinarstva zabilježena stagnacija.

S druge strane, određeni pokazatelji iz vanjskog okruženja kao i preliminarni podaci o vanjskotrgovinskoj robnoj razmjeni u Bosni i Hercegovini su nešto povoljniji u odnosu na prethodnu godinu. Naime, posljednji raspoloživi podaci Eurostat-a ukazuju na postepenu stabilizaciju ekonomskih prilika u zemljama EU koje su istovremeno i glavna izvozna tržišta za bosanskohercegovačke izvozne proizvode. Naime, prema podacima Eurostat-a rast BDP-a u zemljama EU 2025. godine iznosio je 1,5% što je nešto više u odnosu na prethodnu godinu kada je stopa

² Agencija za statistiku Bosne i Hercegovine, Saopštenje, „Bruto domaći proizvod, rashodni pristup, tromjesečni podaci za K4 2025. godinu“, 30.03.2026. godine;

³ Projekcije DEP-a, Mart 2026.godine;

Dokument okvirnog budžeta (DOB) Općine Teočak za period 2027.-2029.godina

rasta iznosila 1,1%.⁴ Ovaj oporavak izvozne tražnje u velikoj mjeri je doprinio stabilizaciji izvoza iz Bosne i Hercegovine nakon negativnih stopa rasta u prethodne dvije godine. Naime, procjena DEP-a je da je u 2025. godini došlo do povećanja ukupnog izvoza iz Bosne i Hercegovine od 2,6%, pri čemu je rast izvoza roba iznosio 3,3%, dok je izvoz usluga stagnirao. Pored povećanja izvoza, u 2025. godini u Bosni i Hercegovini usljed jačanja domaće tražnje (rast potrošnje i investicija) nastavljen je i trend rasta uvoza. Tako se procjenjuje da rast ukupnog uvoza iznosio 5,2%, pri čemu je rast uvoza roba iznosio 5,5% a usluga 1,9% u poređenju sa prethodnom godinom. Ovakva kretanja izvoza i uvoza u 2025. godini rezultirali su povećanjem vanjskotrgovinskog deficita u Bosni i Hercegovini od oko 13%, što je u konačnici rezultiralo negativnim doprinosom u ukupnom ekonomskom rastu od 1,7 p.p.⁵

Trenutno raspoloživi izvještaji međunarodnih finansijskih institucija za 2026. godinu ukazuju na nastavak trenda rasta ekonomske aktivnosti ali i geopolitičkih nestabilnosti koje bi mogle imati negativne ekonomske posljedice kako u svijetu tako i u zemljama EU. Razvoj ovih dinamika u međunarodnom ekonomskom okruženju u velikoj mjeri će odrediti i ekonomska kretanja u Bosni i Hercegovini u narednom periodu. U skladu sa ovim međunarodnim kretanjima i u Bosni i Hercegovini u 2026. godini se može očekivati nastavak trenda rasta ekonomske aktivnosti. Naime, prema projekcijama DEP-a a na bazi raspoloživih podataka i makroekonomskih modela u Bosni i Hercegovini se u 2026. godine može očekivati realni rast BDP-a od oko 2,0%. Glavne pretpostavke u osnovnom scenariju ekonomskih kretanja u Bosni i Hercegovini za 2026. godinu predstavlja stabilizacija eksternih dinamika u vanjskom okruženju i internih dinamika u zemlji. U skladu s tim, očekuje se da bi domaća tražnja kroz povećanje potrošnje i djelimično investicija trebala predstavljati glavno uporište projektovanog ekonomskog rasta, uz nešto pozitivniji doprinos vanjskog sektora u odnosu na prethodnu godinu. Prema projekcijama DEP-a, stagnacija broja zaposlenih, nastavak trenda rasta plata, povećan priliv doznaka građana iz inostranstva uz očekivanu inflaciju od 4,1% bi trebali rezultirati porastom raspoloživog dohotka građana što bi omogućilo nastavak trenda rasta privatne potrošnje u Bosni i Hercegovini od 1,4%. Pored privatne potrošnje, planirana povećanja budžeta na svim nivoima vlasti ukazuju na mogući rast javne potrošnje sa očekivanom stopom rasta od 2,2%. Očekivana povećanja kako privatne tako i javne potrošnje ukazuju da se u 2026. godini u Bosni i Hercegovini može očekivati rast finalne potrošnje od 1,6% uz pozitivan doprinos ekonomskom rastu od 1,4 p.p. Ako se ima u vidu da finalna potrošnja u strukturi BDP-a u Bosni i Hercegovini učestvuje sa oko 85%, može se zaključiti će ovaj projektovani rast potrošnje predstavljati ključno uporište ekonomskog rasta u zemlji. S druge strane, pored povećanja potrošnje unatoč određenim internim izazovima u Bosni i Hercegovini se očekuje i nastavak trenda rasta investicija. Međutim očekivana stopa rasta investicija je nešto niža u odnosu na na prethodnu godinu i iznosi oko 4,7% uz pozitivan doprinos ekonomskom rastu od skoro 1,3 p.p. Pored domaće tražnje, u Bosni i Hercegovini se u 2026. godini očekuje nastavak trenda rasta ukupne vanjskotrgovinske razmjene. U skladu s tim, u 2026. godini u Bosni i Hercegovini se može očekivati povećanje ukupnog izvoza od 1,9%, pri čemu je očekivani rast izvoza roba 1,0% a rast izvoza usluga 4,2%. S druge strane, visok nivo domaće tražnje (porast potrošnje i investicije) rezultirao bi povećanjem ukupnog uvoza u Bosni i Hercegovinu od 2,6%, pri čemu je očekivani rast uvoza roba 2,6% a uvoza usluga 3,2%. Ovakva kretanja izvoza i uvoza u 2026. godini rezultirali bi povećanjem vanjskotrgovinskog bilansa od 4,7% uz negativan doprinos ekonomskom rastu od 0,6 p.p. i pokrivenost uvoza izvozom od 75,6%.

Imajući u vidu navedeno u Federaciji BiH u tekućoj 2025. godini očekuje se skroman rast realne ekonomske aktivnosti od 2,0%, a za period 2027-2029. godine prosječna stopa realnog rasta procjenjuje se na 3,0%.

⁴ <https://ec.europa.eu/eurostat/web/products-euro-indicators/w/2-06092024-sept#:~:text=>

⁵ Projekcije DEP-a, Mart 2026. godine;

Dokument okvirnog budžeta (DOB) Općine Teočak za period 2027.-2029.godina

Tabela 1: Projekcija rasta BDP-a

	Zvanični podaci	Projekcije				
	2024	2025	2026	2027	2028	2029
Nominalni rast	6,0	7,9	5,8	5,1	5,3	5,6
Realni rast	2,6	2,1	2,0	2,6	3,0	3,4

Izvor: DEP, mart 2026. godine

Direkcija za ekonomsko planiranje (DEP) pri Vijeću Ministara Bosne i Hercegovine izradila je makroekonomske pokazatelje na nivou Bosne i Hercegovine, koji se daju u slijedećem tabelarnom pregledu:

Tabela 2: Makroekonomski pokazatelji za period 2024-2029

Indikator	Zvanični podaci	Projekcije				
	2024	2025	2026	2027	2028	2029
Nominalni BDP u mil KM	55.091	59.440	62.895	66.115	69.602	73.486
Nominalni rast u %	6,0	7,9	5,8	5,1	5,3	5,6
BDP deflator (prethodna godina = 100)	103,4	105,7	103,7	102,5	102,2	102,1
Realni BDP u mil KM (prethodna godina = 100)	53.300	56.247	60.651	64.521	68.101	71.987
Realni rast u %	2,6	2,1	2,0	2	3,0	3,4
Inflacija mjerena indeksom potrošačkih cijena u %	1,7	4	4,1	2,2	2,1	2
Potrošnja u mil KM	47.560	50.700	53.459	56.068	58.546	61.292
Realni rast u %	4,1	2,2	1,6	2,1	2	2,3
Vladina potrošnja u mil KM	10.524	11.471	11.896	12.729	13.518	14.329
Realni rast u %	2,8	2,8	2,2	1,9	2,1	1,9
Privatna potrošnja u mil KM	37.036	39.229	41.563	43.340	45.028	46.963
Realni rast u %	4,4	2,0	1,4	2,1	2	2,4
Investicije (bruto) u stalna sredstva u mil KM	13.097	14.194	14.962	16.024	17.154	18395
Realni rast u %	10,2	5,2	3,3	5,4	5,5	5,7
Vladine investicije u mil KM	1.831	2.106	2.306	2.520	2.772	3.049
Realni rast u %	16,9	11,7	7,2	7,4	7,7	7,7
Privatne investicije u mil KM	11.266	12.088	12.656	13.504	14.382	15.346
Realni rast u %	9,2	4,2	2,6	5,0	5,1	5,3
Uvoz u mil KM	29.057	30.602	31.878	33.548	35.429	37.416
Nominalni rast u %	4,5	5,3	4,2	5,2	5,6	5,6
Realni rast u %	4,7	5,2	2,6	3,5	4,1	3,1
Izvoz u mil KM	21.879	23.133	24.033	25.177	26.640	28.188
Nominalni rast u %	-0,2	5,7	3,9	4,8	5,8	5,8
Realni rast u %	-1,6	2,6	1,9	3,2	4,2	3,2
Nacionalna bruto štednja u % BDP-a	23,1	23,9	24,2	24,3	24,7	25,3
Bilans tekućeg računa u mil KM	-1.860	-1.994	-2.088	-2.371	-2.631	-2.866
Rast u %	74,4	7,2	4,7	1	11,0	8,9
Bilans tekućeg računa u % BDP-a	-3,4	-3,4	-3,3	-3,6	-3,8	-3,9

IZVOR: DEP - mart 2026. godine

Dokument okvirnog budžeta (DOB) Općine Teočak za period 2027.-2029.godina

U posljednjem DEP-ovom dokumentu makroekonomskih projekcija napominje se da važnu odrednicu za ekonomska kretanja u Bosni i Hercegovini u periodu od 2027. godine, pored internih dinamika, predstavljaju i ekonomska kretanja u vanjskom okruženju, naročito u zemljama EU-27. DEP-ove projekcije makroekonomskih pokazatelja zasnivaju se na trenutno dostupnim srednjoročnim prognozama Evropske komisije (European Economic Forecast). Prema ovim projekcijama, očekuje se da će u posmatranom periodu privreda Evropske unije stabilizovati svoj realni ekonomski rast na stopama iznad 1,5%, dok bi se inflacija trebala trajno približiti ciljanoj razini od oko 2%, uz stabilnu stopu nezaposlenosti na nivou od oko 5,9%.

Veoma važnu odrednicu za ekonomska kretanja u Bosni i Hercegovini u periodu 2027.-2028. pored internih dinamika predstavljat će i ekonomska kretanja u vanjskom okruženju, naročito u zemljama EU27. Naime, posljednjih nekoliko godina svjetsku ekonomiju, a samim tim i ekonomska kretanja u Bosni i Hercegovini obilježile su veliki izazovi, kao što su globalna pandemija, sukobi u Ukrajini i Bliskom istoku, svjetska energetska kriza i dr. Negativne ekonomske posljedice ovih dešavanja na svjetsku ekonomiju su već vidljive i manifestuju se kroz trgovinske, finansijske, cjenovne šokove koji nisu zaobišli ni Bosnu i Hercegovinu.

Naime, raniji izvještaji su pokazali da vanjsko okruženje (EU i zemlje regiona) predstavljaju veoma važnu strukturalnu odrednicu svih ekonomskih kretanja u Bosni i Hercegovini. Međutim, unatoč evidentnim nestabilnostima u svijetu referentne međunarodne institucije u svijetu kao što su MMF - Međunarodni Monetarni Fond, Svjetska Banka i Evropska Komisija u određenim publikacijama ukazuju na nastavak trenda ekonomskog rasta. Projicirana stopa globalnog ekonomskog rasta u toku ovog perioda iznosi oko 3%, dok DG ECFIN-a za zemlje EU u svom proljetnom izvještaju nastavak trenda ekonomskog rasta i stabiliziranje inflacije. S toga vrijedi istaći da se DEP prilikom pripreme ovog izvještaja u okviru projiciranja ekonomskih kretanja u međunarodnom ekonomskom okruženju koristio trenutno dostupnim izdanjem *Autumn 2025 Economic Forecasts (November 2025)*.⁶ Prema navedenom izvještaju projektovani realni ekonomski rast u Eurozoni u 2027. godini iznosi 1,4%, dok očekivana stopa inflacije iznosi 2,0%. Obzirom da vanjsko okruženje predstavljaju veoma važnu determinantu svih ekonomskih kretanja u Bosni i Hercegovini vrijedi istaći da će najnovija dešavanja imati odlučujuću ulogu za izgled ekonomskog rasta u zemlji u narednom periodu. Osim eksternih dinamika, jako bitan faktor za ekonomski rast u zemlji tokom programskog perioda 2027.-2028. godina predstavljat će i institucionalni kapacitet zemlje u provedbi strukturalnih reformi kako bi se ojačao doprinos internih dinamika u kreiranju istog. Daljnje usložnjavanje kako eksternih tako i internih dinamika bi imalo veoma negativne posljedice po bosanskohercegovačku ekonomiju i smanjila njen potencijalni rast. Imajući u vidu navedene kako eksterne tako i interne okolnosti, prema projekcijama DEP-a u osnovnom scenariju za period 2027.-2029. godina u Bosni i Hercegovini se može očekivati ekonomski rast od oko 3,0% na godišnjem nivou (2027. 2,6%, u 2028. 3,0% i 2029. godini 3,4%).¹⁰ Pretpostavlja se da bi ključni oslonac ekonomskog rasta tokom ovog perioda trebala predstavljati domaća tražnja kroz povećanje privatne potrošnje i investicija. Naime, adekvatna provedba strukturalnih reformi (ERP, Reformska Agenda i ostali strateški dokumenti) doveli bi do povećanja ukupne ekonomske aktivnosti u zemlji kroz povećanje ukupne proizvodnje, broja zaposlenih, povećanja investicionih ulaganja (privatnih i javnih), kao i prihoda od izvoza (roba i usluga). U osnovnom scenariju se očekuje da bi ova dešavanja u konačnici rezultirala povećanjem raspoloživog dohotka građana a samim tim i povećanjem privatne potrošnje koja će kao i prethodnih godina predstavljati ključni oslonac ekonomskog rasta. Tako se u periodu 2027. - 2029. godine očekuje prosječna stopa rasta privatne potrošnje od 2,2%. S druge strane, imajući u vidu visok nivo javne potrošnje u okviru BDP-a u Bosni i Hercegovini i napore koji se ulažu kroz proces fiskalne konsolidacije u Bosni i Hercegovini tokom ovog perioda očekuje se postepena stabilizacija javnih finansija kroz smanjenje javnih rashoda i istovremeno povećanje javnih prihoda kako bi se ograničio rast javne potrošnje. Tako se u periodu 2027.-2029. godina očekuje prosječni rast javne potrošnje od oko 2,0% na godišnjem nivou. Ako se ima u vidu da bi tokom ovog perioda projicirana stopa ekonomskog rasta bila viša u odnosu na rast javne

⁶ <https://economy-finance.ec.europa.eu/economic-forecast-and-surveys/economic-forecasts/autumn-2025-economic-forecas>;

Dokument okvirnog budžeta (DOB) Općine Teočak za period 2027.-2029.godina

potrošnje, udio iste u strukturi BDP-a bi se djelimično smanjio. U ovom vremenskom periodu očekuje se da bi mjerama fiskalne politike dio sredstava iz tekuće potrošnje trebao biti kanaliziran u svrhu jačanja investicione potrošnje u Bosni i Hercegovini. Samim tim, uz poboljšanje poslovnog ambijenta, investicije bi za razliku od prethodnih godina mogle imati značajniji rast a samim tim i veći doprinos u očekivanom rastu BDP-a.

U periodu 2027.-2029. godina u Bosni i Hercegovini se očekuje povećanje investicija po prosječnoj godišnjoj stopi rasta od oko 5,5% (2027: 5,4%, 2028: 5,5% i 2029: 5,7%). U ovom vremenskom okviru pored povećanja privatnih investicija koje čine većinski dio ukupnih investicija (oko 85% ukupnih investicija u Bosni i Hercegovini) kao što je to i ranije navedeno, očekuje se i značajniji doprinos javnih investicija. Smatra se da bi napredak u procesu evropskih integracija u kombinaciji sa unapređenjem poslovnog okruženja kroz reformske procese mogli povećati interes kako domaćih tako i stranih investitora za investiciona ulaganja u Bosnu i Hercegovinu. S druge strane, obzirom na strukturu i poziciju ekonomije Bosne i Hercegovine, smatra se da će javne investicije predstavljati nešto važniju polugu za podsticanje ekonomskog rasta u srednjem roku.

Projekti u okviru izgradnje putne infrastrukture i energetske projekti-zelena tranzicija, kao i raspoloživost sredstava kod međunarodnih finansijskih institucija bi uz adekvatnu i pravovremenu implementaciju istih mogli rezultirati godišnjim povećanjem javnih investicija od oko 7,5% na godišnjem nivou. Postepena stabilizacija u eksternom okruženju uz unaprijeđenje industrijske baze i podizanje konkurentnosti u zemlji predstavljaju preduslov poboljšanja vanjskotrgovinske razmjene sa svijetom. Međutim, za razliku od ranijih projekcija dodatni izazov bh. ekonomiju naročito u okviru izvozno orijentisane prerađivačke industrije i izvoza roba predstavljat će uvođenje CBAM-a (Carbon Border Adjustment Mechanism) od strane EU. Kašnjenja i parcijalna provedba potrebne regulative mogli bi značajno oslabiti međunarodnu konkurentnost bosanskohercegovačke ekonomije i oslabiti njenu vanjsku poziciju na izvoznim tržištima. U tom slučaju u Bosni i Hercegovini se može očekivati nešto niži prosječni godišnji rast ukupnog izvoza od oko 3,5% (2027: 3,2%, 2028: 4,2% i 2029: 3,2%). Ovdje posebno treba naglasiti doprinos usluga, obzirom da je udio istih u posljednjih nekoliko godina značajno uvećan i vrlo često amortizovao određene gubitke u okviru izvoza roba koji su nastali usljed fluktuacija na međunarodnim tržištima. Tako bi tokom ovog perioda zahvaljujući ovom izvoznom rastu udio izvoza u BDP-u bio povećan na oko 38,5% na kraju 2029. godine. S druge strane, očekuje se da bi se uvoz u ovom vremenskom periodu trebao kretati po godišnjoj stopi rasta od 3,6% (2027: 3,5%, 2028: 4,1% i 2029: 3,1%). Posljedica ovakvog kretanja uvoznog rasta bila bi stabilizacija udjela uvoza u BDP-u na oko 50,5% BDP-a na kraju 2029. godine što bi rezultirao postepenom stabilizacijom vanjskotrgovinskog bilansa kao udio u BDP-u na oko 12%, odnosno neutralnim doprinosom ekonomskom rastu, dok bi pokrivenost uvoza izvozom zaključno sa 2029. godinom trebala iznositi skoro 75%.

Srednjoročne projekcije javnih prihoda u Federaciji BiH prate makroekonomska očekivanja kretanja onih agregata s kojima su u značajnoj korelaciji. S obzirom na visok nivo nepredvidivosti krajnjeg ishoda ekonomskih tokova, moguće su i značajnije promjene u realizaciji projekcija javnih prihoda. Neizvjesnost u vanjskom okruženju prepoznata je kao značajan rizik po ostvarenje prognoziranog srednjoročnog ekonomskog rasta. Od domaćih rizika, značajan potencijalni negativni uticaj mogao bi imati spor tempo provođenja ekonomskih reformi. Poseban akcenat stavlja se i na obavezu provedbe reformi domaćeg zakonodavstva u oblasti zelene energije do 2027. godine, čije bi kašnjenje moglo u značajnoj mjeri ugroziti ukupnu konkurentnost Bosne i Hercegovine te dovesti do pada bruto domaćeg proizvoda.

Projekcije poreznih prihoda i obaveznih socijalnih doprinosa za 2026. godinu temelje se na trenutno provedenim izmjenama politika, prate projektovane makroekonomske pokazatelje, kao i tekuće trendove u naplati, korigovane za jednokratne uticaje. Potencijalna implementacija novih mjera u ovoj oblasti u narednom srednjoročnom periodu može značajno uticati na projicirani nivo naplate. Na drugačiji ishod u naplati javnih prihoda mogu značajno uticati: izmjene ostalih poreznih politika, značajna odstupanja u kretanju koeficijenta raspodjele prihoda od indirektnih poreza između entiteta u odnosu na trenutno procijenjeni, promjene u nivou planirane otplate vanjskog duga, promjene u izdvajanjima prihoda od indirektnih poreza za institucije BiH, rad poreznih administracija, kao i razvoj drugih događaja poput novih elementarnih nepogoda i sl.

Dokument okvirnog budžeta (DOB) Općine Teočak za period 2027.-2029.godina

1.2. Osnovne pretpostavke i ciljevi makroekonomske politike BiH i Federacije BiH u periodu 2026.- 2028. godina

Fiskalna politika, usklađena je sa mjerama Reformske agende, u 2026. godini i narednom srednjoročnom periodu fokusirana je na podršci makroekonomskom rastu, u cilju povećanja fiskalnog prostora politikama koje promovišu dugoročni rast i suzbijaju sivu ekonomiju. Ključne aktivnosti prvenstveno podrazumijevaju djelovanje u pravcu stvaranja povoljnog i stabilnog poslovnog okruženja, atraktivnog za povećan priliv domaćih i stranih investicija, kao glavnog generatora prognozirano srednjoročnog makroekonomskog rasta. Provedbu planiranih aktivnosti i dalje prati nastavak reformi u cilju kreiranja stabilnog poreznog sistema i približavanja istog standardima Evropske unije.

Osnovni makroekonomski ciljevi FBiH u narednom srednjoročnom periodu su:

- Makroekonomska stabilnost
- Stabilnost finansijskog sektora
- Restrukturiranje javne potrošnje i očuvanje socijalne stabilnosti
- Očuvanje tržišta rada i provođenje mjera za povećanje zaposlenosti
- Održivi razvoj
- Evropske integracije
- Socijalna uključenost.

Najvažniji cilj u narednom srednjoročnom periodu je očuvanje i dalje jačanje makroekonomske stabilnosti Federacije BiH. U planiranju vlastitog napretka, mora se početi od reformi u socijalnom i ekonomskom sektoru. Trebaju se stvarati uslovi i pretpostavke za punu zaposlenost radne snage i korištenje proizvodnih kapaciteta, koji bi trebali dati krajnji rezultat, povećanje bruto domaćeg proizvoda.

Makroekonomska stabilnost Federacije BiH može biti ugrožena ako bi se nastavilo akumuliranje fiskalnih deficita i nekontrolirano zaduživanje te visoki deficiti tekućeg računa, pa se stoga moraju preduzeti mjere za prilagođavanje uslovima koje diktira postojanje valutnog odbora sa ciljem da se doprinese stabilnosti valute i cijena.

Evropske integracije, kao makroekonomski cilj, omogućit će Federaciji BiH dobijanje dopunskih finansijskih sredstava za potrebe procesa evropskih integracija, od kojih je najznačajnija predpristupna finansijska pomoć Evropske unije (IPA).

Dokument okvirnog budžeta (DOB) Općine Teočak za period 2027.-2029.godina

Poglavlje 2 - Srednjoročna porezna politika i prognoza direktnih i indirektnih poreza

U ovom poglavlju su izložene projekcije prihoda koje se očekuju za finansiranje javne potrošnje u toku srednjoročnog perioda, a na osnovu projiciranih makroekonomskih pokazatelja i postojećih poreznih politika. Prioriteti u oblasti porezne politike i javnih prihoda za period 2027.-2029. godina bit će orijentisani na nastavku aktivnosti predlaganja zakonskih rješenja radi osiguranja ambijenta za privredni rast društva, stabilnih i predvidivih uslova poslovanja i jačanje prihodovne strane budžeta svih nivoa vlasti uz poboljšanje naplate javnih prihoda kao osnovnog agregata za planiranje razvojnih, socijalnih i drugih društvenih potreba i obaveza.

Prioriteti u oblasti porezne politike i javnih prihoda u FBiH, a koji će imati utjecaj na Tuzlanski kanton i gradove/općine na području kantona za period 2027-2029. godine bit će orijentisani na nastavak aktivnosti izrade prijedloga zakonskih rješenja kojima će se doprinijeti osiguranju i očuvanju ambijenta pogodnog privrednom rastu, sa stabilnim i predvidivim uslovima poslovanja, te poboljšanju naplate javnih prihoda. U oblasti javnih prihoda kontinuirano se provode aktivnosti na pojačanom inspekcijskom nadzoru s ciljem poticanja poštivanja propisa u cilju poboljšanja porezne discipline, suzbijanju sive ekonomije te postizanje efikasnije naplate javnih prihoda.

Zakonom o pripadnosti javnih prihoda u Federaciji BiH ("Službene novine Federacije BiH" broj: 22/06, 43/08, 22/09, 35/14, 94/15 i 17/22) je detaljno definisana raspodjela prihoda indirektnih poreza između Federacija, kantona, jedinica lokalne samo uprave i direkcije cesta.

Srednjoročne projekcije javnih prihoda u Federaciji BiH prate pozitivna makroekonomska očekivanja u kretanju onih agregata sa kojim su u značajnoj korelaciji. Kod nekih stavki, u cilju očuvanja fiskalne discipline, već unutar osnovnog scenarija uključeni su i procijenjeni efekti pojedinih visokih rizika po ostvarenje makroekonomskih prognoza. Projekcije su usko vezane za pretpostavljenu brzinu oporavka ekonomije u postpandemijskom periodu, ali i sa najnovijim negativnim dešavanjima na globalnom planu u Ukrajini, Bliskom Istoku i Iranu, koja su se odrazila na cjelokupnu ekonomiju. Obzirom na krajnju nepredvidivost mogućih budućih šokova, posebno kada je riječ o stanju inflacije, moguće su značajne promjene u krajnjem ishodu makroekonomskih prepostavki, pa tako i projekcija javnih prihoda.

Srednjoročne projekcije prihoda za period 2027.-2029. godina prate pozitivne makroekonomske prognoze za navedeni period, ali istovremeno zadržavajući određeni nivo opreznosti i konzervativnosti u procjenama.⁷

Posmatrajući prihodovnu stranu, cilj je i osigurati srednjoročnu fiskalnu održivost budžeta u koji se prihodi po osnovu poreza na dohodak uplaćuju, a koji će uslijed smanjenja javnih prihoda po osnovu jednog izvora dohotka biti kompenzirani oporezivanjem drugog izvora dohotka (ulaganje kapitala, nagradnih igara i igara na sreću, ostali dohodak). Na taj način, planirane izmjene će imati neutralan efekat na ukupan nivo ostvarenja javnih prihoda po ovoj kategoriji.

⁷ Smjernice ekonomske i fiskalne politike TK za period 2027-2029. godine, broj: 02/1-11-16881/26 od 26.05.2025. godine

Dokument okvirnog budžeta (DOB) Općine Teočak za period 2027.-2029.godina

2.1. Indirektni porezi

Kada je riječ o projekcijama prihoda od indirektnih poreza, iste su bazirane na srednjoročnom Planu naplate ukupnih prihoda na Jedinstvenom računu, preuzetom od strane Odjeljenja za makroekonomsku analizu Upravnog odbora Uprave za indirektno oporezivanje (OMA) iz aprila 2026. godine. Na osnovu srednjoročnih kretanja krajnje potrošnje izvršena je procjena učešća Federacije BiH u međuentitetskoj raspodjeli, dok je projekcija raspoloživog dijela ovih prihoda za raspodjelu korisnicima Federacije BiH, po godinama, zasnovana i na planu otplate vanjskog duga.

Projekcije prihoda od indirektnih poreza za srednjoročni period 2027-2029.godina izvršena je u skladu sa koeficijentima iz Uputstva o određivanju učešća kantona, jedinice lokalne samouprave i nadležnih kantonalnih ustanova za ceste u prihodima od indirektnih poreza i načinu raspoređivanja tih prihoda za 2026. godinu ("Službene novine Federacije BiH", broj: 75/24).

Svaki neplanirani događaj u 2026. godini, koji se u značajnoj mjeri može odraziti na pretpostavljene iznose javnih prihoda, eventualno će dovesti i do ponovnog vanrednog revidiranja projekcija prihoda.

Uzimajući u obzir makroekonomske prognoze viših nivoa vlasti kada je u pitanju srednjoročna fiskalna politika, Općina Teočak će u narednom periodu imati za prioritet da u okviru svojih nadležnosti nastavi sa poduzimanjem mjera usmjerenih na poboljšanje fiskalnih kapaciteta i jačanju fiskalne održivosti, pri tome se vodeći kao i do sada racionalnim ulaganjima i trošenju raspoloživih budžetskih sredstava obzirom na cjelokupnu ekonomsku situaciju koja je dosta neizvjesna.

Obzirom da su projekcije prihoda usko vezane za privredni rast, najveći rizik po projekcije kojim smo se vodili pri izradi ovog dokumenta je neuspjeh u ispunjavanju ciljeva privrednog rasta.

Prihodi prikupljeni po osnovu indirektnih poreza (PDV-a, carinskih dadžbina i akciznih dadžbina) se uplaćuju na Jedinstveni račun Uprave za indirektno oporezivanje nakon čega se raspodjeljuju slijedećim redom:

1. Otplate vanjskog duga,
2. Raspodjela na račun rezervi,
3. Raspodjela sredstava za potrebno finansiranje institucija BiH,
4. Raspodjela prihoda između entiteta i Brčko Distrikta.

Nakon raspodjele sredstava za otplatu vanjskog duga, preostalo se raspodjeljuje između entiteta i nižih nivoa vlasti. U skladu sa Zakonom o pripadnosti javnih prihoda u FBiH („Službene novine FBiH“ broj 22/06, 43/08, 22/09, 35/14, 94/15 i 17/22) prihodi sa Jedinstvenog računa se dijele kako slijedi:

1. Finansiranje funkcija Federacije 34,93 %
2. Finansiranje funkcija kantona 51,23 %
3. Finansiranje funkcija jedinica lokalne samouprave 8,42 %
4. Finansiranje funkcija Grada Sarajeva 0,25 %
5. Direkcija za ceste 3,90 %

Zakonom o pripadnosti javnih prihoda u Federaciji BiH je detaljno regulisana raspodjela prihoda od indirektnih poreza između Federacije, kantona, jedinica lokalne samouprave i direkcija za ceste, te puna primjena modela raspodjele prihoda po osnovu indirektnih poreza između svih nivoa vlasti u Federaciji

Dokument okvirnog budžeta (DOB) Općine Teočak za period 2027.-2029.godina

BiH na osnovu propisane formule sa utvrđenim kriterijima iz Zakona o pripadnosti javnih prihoda, koja je i korištena prilikom izrade projekcija za ove nivoe vlasti.

Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine („Službene novine Federacije BiH“, broj: 54/20, 55/20-Isp, 63/20, 88/20, 28/21, 56/21, 83/21, 01/22, 34/22, 57/22, 76/22, 93/22, 94/22, 10/23 i 37/23), definisano je da od ukupno doznačenog iznosa prihoda od indirektnih poreza iz raspodjele sa Jedinствenog računa koji pripadaju nadležnim kantonalnim organima za ceste, kantonalni organi za ceste usmjeravaju 42% sredstava na račun općinskih organa, što čini 25% ukupno doznačenih sredstava.

Takođe, definisano je da od ukupno doznačenog iznosa prihoda od putarine u iznosu od 0,25 KM po jednom litru, za izgradnju autocesta i drugih cesta koji pripadaju nadležnim kantonalnim organima za ceste, kantonalni organi za ceste usmjeravaju 42% sredstava na račun općinskih organa, što čini 25% ukupno doznačenih sredstava.

2.2. Direktni porezi

U skladu sa Zakonom o pripadnosti javnih prihoda u Federaciji BiH, kantoni i općine prikupljaju niz direktnih poreza, koji uključuju porez na dobit pravnih lica, porez na dohodak, porezi na imovinu, kao i neporezne prihode po osnovu kantonalnih i federalnih propisa o porezima na imovinu i niz drugih neporeznih prihoda, koji im omogućavaju finansiranje ustavom utvrđenih funkcija.

Služba za privredu, finansije, prostorno uređenje i civilnu zaštitu Općine Teočak je projekciju prihoda od direktnih poreza u Dokumentu okvirnog Budžeta Općine Teočak za 2027.-2029. godinu uradila na bazi ostvarenih prihoda u 2025. godini, procijenjenih prihoda za 2026. godinu i Revidiranih projekcija koje su dostavljene od strane Ministarstva finansija TK za općine Tuzlanskog kantona.⁸

⁸ „Revidirane projekcije prihoda indirektnih i direktnih poreza gradova/općina Tuzlanskog kantona za 2026. godinu i projekcije za period 2027-2029. godina, broj: 07/1-11-15488/26 od 15.05.2026. godine

Dokument okvirnog budžeta (DOB) Općine Teočak za period 2027.-2029.godina

Poglavlje 3 - Prihodi budžeta Općine Teočak

3.1. Ukupni raspoloživi prihodi

Projekcije prihoda od indirektnih i direktnih poreza za Budžet Općine Teočak za period 2027- 2029. godina zasnivaju se na projekcijama dostavljenih od strane Ministarstva finansija TK za gradove/općine Tuzlanskog kantona iz mjeseca maja 2026. godine.

Projekcije su zasnovane na zadnjim zvaničnim makroekonomskim prognozama, preuzetim od Direkcije za ekonomsko planiranje (DEP), u martu 2026. godine, te prate pretpostavljena kretanja ključnih parametara sa kojima su u korelaciji.

Tabela 3: Tabelarni pregled pripadajućih direktnih i indirektnih poreza po revidiranim projekcijama iz juna 2025.godine za Općinu Teočak

PRIHODI OD DIREKTNIH I INDIREKTNIH POREZA OD VIŠIH NIVOVA VLASTI	REVIDIRANE PROJEKCIJE JUNI 2025.GODINE		
	2027	2028	2029
PDV	1.313.587,00	1.378.487,00	1.457.442,00
POREZ NA DOHODAK	794.560,00	856.364,00	925.354,00
UKUPNO:	2.108.147,00	2.234.851,00	2.382.796,00

Iz Tabele 3. evidentno je da srednjoročne projekcije prihoda za period 2027.-2029. godina prate pozitivne makroekonomske prognoze za navedeni period, ali istovremeno zadržavajući određeni nivo opreznosti i konzervativnosti u procjenama, imajući u vidu da se svaki neplanirani događaj u drugoj polovini 2026. godine, može odraziti na pretpostavljene iznose javnih prihoda, te eventualno dovesti i do vanrednog revidiranja projekcija prihoda za period 2027.- 2029. godina.

Tabela 4. Projekcije prihoda regionalnih cesta TK koje pripadaju Općini Teočak

PRIHODI OD DIREKCIJE CESTA TK	REVIDIRANE PROJEKCIJE MAJ 2026. GODINE		
	2027	2028	2029
Prihodi za finansiranje autocesta u FBiH	19.748,00	20.342,00	24.686,00
Prihodi od poreza koji pripadaju Direkciji cesta	84.841,00	89.033,00	94.132,00
UKUPNO:	104.589,00	109.375,00	118.819,00

Dokument okvirnog budžeta (DOB) Općine Teočak za period 2027.-2029.godina

Projekcije ukupno raspoloživih sredstava u Dokumentu okvirnog budžeta Općine Teočak u periodu 2027.-2029.godina ilustruje slijedeći tabelarni pregled (Tabela 5.):

**Tabela 5. Revidirane projekcije poreznih i neporeznih prihoda, primitaka i sredstava
Općine Teočak za 2026.godinu i period 2027.-2029.godina**

Naziv prihoda	Izvršenje 2025	Plan 2026	Projekcije		
			2027	2028	2029
I / UKUPNO PRIHODI, PRIMICI I FINANSIRANJE (A+B)	4.932.396,54	6.887.000,00	3.861.000,00	3.995.000,00	4.154.000,00
A. UKUPNO PRIHODI BUDŽETA (A.1. + A.2.)	2.490.674,47	2.589.461,00	2.782.500,00	2.915.500,00	3.073.500,00
A.1. Porezni prihodi (1 do 3)	1.999.828,51	2.095.381,00	2.273.986,00	2.405.476,00	2.562.864,00
1.Porez na dobit, porez na plaću i porez na prodaju dobara i usluga (zaostale uplate)	1.756,01	1.800,00	1.250,00	1.250,00	1.250,00
2.Porez na imovinu	62.285,89	59.900,00	60.000,00	60.000,00	60.000,00
3.Porez na dohodak	692.816,93	728.352,00	794.560,00	856.364,00	925.354,00
4.Prihodi od indirektnih poreza	1.242.969,68	1.305.329,00	1.418.176,00	1.487.862,00	1.576.260,00
A.2. Neporezni prihodi (1 do 7)	490.845,96	494.080,00	508.514,00	510.024,00	510.636,00
1.Prihodi od imovine i kursnih razlika	108.496,11	105.057,00	118.057,00	118.057,00	118.050,00
1.Administrativne takse	121.879,00	127.000,00	129.000,00	130.000,00	132.000,00
2.Komunalne naknade i takse	20.600,00	12.000,00	10.000,00	10.000,00	7.000,00
3.Ostale budžetske naknade	179.047,45	190.573,00	191.807,00	192.117,00	192.136,00
4.Posebne naknade i takse	52.745,90	53.500,00	53.600,00	53.700,00	55.200,00
5. Prihodi od pružanja usluga	2.150,00	2.450,00	2.650,00	2.650,00	2.750,00
6. Prihodi od novčanih kazni	565,00	2.500,00	2.500,00	2.500,00	2.500,00
7. Ostale neplanirane uplate	5.362,50	1.000,00	1.000,00	1.000,00	1.000,00
B. NAMJENSKA I VLASTITI SREDSTVA, GRANTOVI, DONACIJE, PRIMICI I VLASTITI PRIHODI (1 do 4)	2.441.722,07	2.667.975,00	1.078.500,00	1.079.500,00	1.080.500,00
1. Grant BIH	12.473,92	2.000,00	3.000,00	4.000,00	5.000,00
2. Grant FBiH	680.480,04	175.000,00	180.000,00	180.000,00	180.000,00
3. Grant TK	1.576.402,50	99.500,00	89.500,00	89.500,00	89.500,00
4. Donacije	6.840,00	4.500,00	6.000,00	6.000,00	6.000,00
5. Kapitalni grantovi	88.600,00	2.369.875,00	800.000,00	800.000,00	800.000,00
6. Povrat sredstava po uplaćenim garancijama	76.925,61	17.100,00	0,00	0,00	0,00
7.Nerasp. višak prihoda nad rashodima	0,00	1.629.564,00	0,00	0,00	0,00

Dokument okvirnog budžeta (DOB) Općine Teočak za period 2027.-2029.godina

Očekivani nivo ukupnih budžetskih sredstava koja su na raspolaganju za finansiranje funkcija Budžeta Općine Teočak u 2026. godini iznosi 6.887.000,00 KM, što je više za 39,63 % u poređenju sa ostvarenjem u 2025. godini koje je iznosilo od 4.932.396,54 KM.

Projekcija bužetskih sredstava za 2027. godinu, kao i za naredne dvije godine, je znatno manja u odnosu na Budžet 2026. godine iz razloga što su u Budžet 2026. godine uključena i raspoređena sredstva ostvarenog suficita iz ranijih godina i sredstva koja su se nalazila na razgraničenjima, a u projekcijama su isključena sredstva kapitalnih grantova od viših nivoa jer je njihova realizacija neizvjesna osim planiranih sredstava za nerazvijene i izrazito nerazvijene općine. Zbog pozitivnih ekonomskih kretanja, u plan za 2027. godinu nije uključen mogući prenos sredstva iz ranijih godina jer postoji velika vjerovatnoća da će se svi projekti realizovati u tekućoj budžetskoj godini.

Projektovani nivo prihoda u 2027. godini iznosi 3.861.000,00 KM, u 2028. godini 3.995.000,00 KM, te u 2029. godini 4.154.000,00 KM. Iz datih projekcija evidentno je da projektovani iznos ukupnih prihoda u 2027.godini ima ukupno smanjenje u odnosu na plan Budžeta 2026. godine za 43,94 % , dok su projektovani prihodi u 2028. veći za 3,47 % u odnosu na projekcije za 2027. godinu, te se u 2029. godini planira povećanje od 3,97 % u odnosu na 2028. godinu.

3.1.1. Porezni prihodi

Porezni prihodi su najznačajniji prihodi Budžeta Općine Teočak. Raspodjelu poreznih prihoda vrše institucije koje su u nadležnosti Federacije Bosne i Hercegovine i Tuzlanskog kantona, a na osnovu Zakona o pripadnosti javnih prihoda u Federaciji Bosne i Hercegovine ("Službene novine FBiH", broj: 22/06, 43/08, 22/09, 35/14 i 94/15) i Zakona o pripadnosti javnih prihoda na području TK ("Službene novine TK", broj: 12/05,8/06 i 5/09).

Prihodi od indirektnih poreza

U Budžet Općine Teočak prema Zakonu o pripadnosti javnih prihoda od indirektnih poreza uplaćuje se dio poreza na dodanu vrijednost (PDV), dio poreza koji pripada Direkciji cesta i dio poreza za finansiranje autocesta u FBiH, a uplaćuje se prema zakonom određenim kriterijima jedinicama lokalne samouprave. Najznačajniji u ovoj grupi prihoda je prihod od PDV-a, koji je u DOB-u planiran u skladu sa smjernicama datim od strane viših nivoa vlasti sa projekcijom rasta za predstojeći trogodišnji period.⁹

Projekcija PDV-a za 2027. godinu iznosi 1.313.587,00 KM, što je za 10,55 % više u odnosu na revidirani plan 2026.godine koji iznosi 1.245.154,00 KM. Prema projekcijama datim od viših nivoa vlasti, iznos PDV-a u 2028. godini povećava se za 4,94 % u odnosu na iznos u 2027. godini i iznosi 1.378.487,00 KM, a u 2029. godini predviđa rast za 5,73 % u odnosu na 2028. godinu i iznosi 1.457.442,00 KM.

Prihodi od direktnih poreza- Porez na dohodak

Projekcije prihoda od poreza na dohodak u periodu 2027.- 2029. godina zasnivaju se na projekcijama dostavljenih od strane Ministarstva finansija TK za općine Tuzlanskog kantona iz mjeseca maja 2026.

⁹ „Revidirane projekcije prihoda indirektnih i direktnih poreza gradova/općina Tuzlanskog kantona za 2026. godinu i projekcije za period 2027-2029. godina, broj: 07/1-11-15488/26 od 15.05.2026. godine

Dokument okvirnog budžeta (DOB) Općine Teočak za period 2027.-2029.godina

godine.¹⁰

Prihodi od poreza na dohodak, u skladu sa važećim projekcijama datim od strane viših nivoa vlasti, u 2027. godini veći su za 7,63 % u odnosu na revidirani plan 2026. godine, za koju je planirano ostvarenje u iznosu od 738.234,00 KM.

U periodu 2027.- 2029. godina projekcije prihoda po osnovu poreza na dohodak pokazuju blagi rast. U 2028. godini planirani su u iznosu od 856.364,00 KM i veći za 7,78 % odnosu na 2027. godinu u kojoj su planirani u iznosu od 794.560,00 KM.

Dalji rast planiran je i u 2029. godini u iznosu od 925.354,00 KM, što je za 8,06 % više u odnosu na iznos projekcije za 2028. godinu.

Porezi na imovinu

Ovi porezi obuhvataju porez na imovinu od fizičkih i pravnih lica, porez na nasljeđe i darove, porez na promet nepokretnosti fizičkih i pravnih lica i ostale poreze na imovinu koji se naplaćuju i raspoređuju između budžeta kantona i općina prema kantonalnim propisima.

Projekcija ovih prihoda za 2027. godinu iznosi 60.000,00 KM, i neznatno je viša u odnosu na planirani nivo ostvarenja u 2026. godini, te je identična projekcijama za 2028. i 2029. godinu.

3.1.2. Neporezni prihodi

Neporezni prihodi uključuju:

- Administrativne takse
- Komunalne naknade i takse
- novčane kazne
- posebne naknade
- ostali neporezni prihodi (uključujući i vlastite prihode budžetskih korisnika).

Očekivani ukupni iznos prikupljenih neporeznih prihoda u 2027. godini iznosi 508.514,00 KM, te se i u naredne dvije godine, 2028. i 2029., predviđa isti iznos kao u planu za 2027. godinu.

Potrebno je napomenuti da su neporezni prihodi još uvijek najslabija tačka sagledavanja prihoda, koji se kao takvi različito tretiraju u kantonima, gradovima, općinama i Federaciji, zbog čega treba uslijediti njihovo specificirano i unificirano praćenje.

Veoma značajna prihod u ovoj grupi prihoda su sredstva koja se planiraju ostvariti od naknade koju po Zakonu uplaćuje JP Elektroprivreda BiH kao naknadu za potopljeno zemljište. Ova sredstva planiraju se na godišnjem nivou u iznosu od 160.000,00 KM i čine cca 32% ukupno planiranih neporeznih prihoda.

¹⁰ „„Revidirane projekcije prihoda indirektnih i direktnih poreza gradova/općina Tuzlanskog kantona za 2026. godinu i projekcije za period 2027-2029. godina, broj: 07/1-11-15488/26 od 15.05.2026. godine

Dokument okvirnog budžeta (DOB) Općine Teočak za period 2027.-2029.godina

3.2. Rizici po projekcije prihoda

Projekcije prihoda su usko vezane za ekonomski rast. Eksterno okruženje predstavlja ključnu strukturnu odredicu domaće ekonomije, pa stoga i ključni rizik po ekonomski rast leži u ventualnom slabljenju izvozne tražnje, što bi dovelo do smanjenja izvoda bh. Proizvoda na inostrana tržišta, posebno izvoza na tržišta zemalja EU.

Rizici ostvarenja projiciranih prihoda mogu biti:

- veće usporavanje predviđenog ekonomskog rasta;
- nepredviđene promjene poreznih politika (odsustvo stabilnih koeficijenata raspodjele indirektnih poreza i nepredviđene promjene istih i dr.);
- makroekonomske pretpostavke;
- promjena nivoa zaduženosti Federalnog budžeta (otplate vanjskog duga FBiH);
- razvoj drugih događaja (efikasnost porezne uprave u kontroli naplate javnih prihoda, mogućnost elementarne nepogode).

Obzirom da su rizici po projekcije najvećim dijelom vezani za vanjske faktore (situaciji vezanoj za rat u Ukrajini, Bliskom Istoku, postpandemijski period i energetske krizu), neizvjesnost povezana sa projekcijama je na visokoj razini. Razvoj događaja na ukrajinskom i Iranskom ratištu, Bliskom Istoku i rješavanje globalnih energetskih problema predstavljaju glavne rizike po načinjene projekcije. S duge strane, na ostvarenje projekcija utjecat će i unutrašnji faktori vezani za kompleksnu administrativnu organizaciju Federacije BiH, složen sistem donošenja odluka, spor tempo provođenja reformskih mjera i sl. Eventualna kašnjenja u provođenju strukturnih reformi mogla bi se negativno odraziti na privredni rast. Također, rizik koji se odnosi na migraciju stanovništva pogotovo aktivnog radnog stanovništva iz Federacije BiH u konačnici bi mogao imati negativan odraz na produktivnost te rezultirati sporijim rastom BDP - a od projektovanog. Postoje značajni rizici za ostvarenje projekcija prihoda od indirektnih poreza zbog ogromnih nepoznanica u pogledu dešavanja u Ukrajini, Bliskom Istoku. Ostvarenje projektiranog nivoa prihoda od indirektnih poreza u periodu 2027. -2029. godina je podložno sljedećim rizicima: svim rizicima za ostvarenje projektiranih makroekonomskih pokazatelja (DEP) i rizicima koji se odnose na samu naplatu prihoda od indirektnih poreza i borbu protiv sive ekonomije.

Projekcije prihoda od indirektnih poreza su usko vezane za projekcije makroekonomskih pokazatelja DEP-a. Svi rizici koje DEP pominje u svojim projekcijama po automatizmu predstavljaju i rizike za projekcije prihoda od indirektnih poreza, pošto svako odstupanje realizacije DEP-ovih parametara od njihovih projektiranih vrijednosti neizbježno dovodi i do odstupanja realiziranih projektiranih prihoda od indirektnih poreza.

Izvršenje raspoloživih prihoda po osnovu indirektnih poreza za budžetske korisnike u Federaciji BiH direktno će ovisiti i o planu otplate vanjskog duga u period 2027-2029. godina, s obzirom da se ukupan iznos prihoda s Jedinstvenog računa, koji pripada Federaciji BiH, u skladu s članom 21. Zakona o sistemu indirektnog oporezivanja („Službeni novine BiH“, broj: 44/03) umanjuje za iznos sredstava potrebnih za servisiranje inozemnog duga Federacije BiH. Projekcije su rađene pod pretpostavkom da neće doći do prenosa nadležnosti između jedinica lokalne samouprave i drugih nivoa vlasti, kao i zakonskih promjena u oblasti indirektnog oporezivanja.

Dokument okvirnog budžeta (DOB) Općine Teočak za period 2027.- 2029.godina

Poglavlje 4. Struktura potrošnje u javnom sektoru

U ovom poglavlju je opisana politika javnih rashoda i dat kratak pregled ključne problematike vezane za oblasti upravljanja resursima javnog sektora. Data je analiza strukture javnih rashoda po glavnim ekonomskim stavkama i trendovi njihovih kretanja tokom protekle dvije godine. Ova analiza je važan element procesa srednjoročnog planiranja budžeta jer daje kontekst i osnovu za izradu planova budžetske potrošnje i gornjih granica rashoda.

U skladu sa planiranim okvirom raspoloživih sredstava i prihvaćenom politikom javnih rashoda, u ovom poglavlju date su preporuke o strukturi budžetske potrošnje za naredni trogodišnji period po glavnim ekonomskim stavkama.

S tim u vezi, detaljno su razmotrene pojedine kategorije troškova, uključujući plaće i naknade, materijalne troškove, transfere i kapitalnu potrošnju unutar budžeta Općine Teočak. Kao i prethodnih godina, planiranje budžeta će se oslanjati na načela stabilizacijskog djelovanja fiskalne politike kroz smanjenje javne potrošnje.

Općina Teočak je čvrsto opredijeljena za nastavak provođenja mjera štednje javne potrošnje u periodu 2027.- 2029. godine, čiji je osnovni cilj održavanje stabilnog fiskalnog sistema, održavanje budžetske ravnoteže i kontrola javne potrošnje.

Mjere štednje javne potrošnje će se nastaviti provoditi kao i u prethodnim godinama, kroz ograničavanje rasta tekućih rashoda, uz istovremeno nastojanje očuvanja socijalne pravednosti i zaštite najugroženijih grupa stanovništva i boračkih populacija, te osiguranje aktivnog doprinosa povećanju investicionih aktivnosti. Ovo uključuje veću kontrolu troškova materijala i usluga, restriktivno planiranje i veću kontrolu tekućih i kapitalnih transfera, kao i realno planiranje nabavke stalnih sredstava.

4.1. Rashodi Budžeta Općine Teočak

U Budžetu Općine Teočak za 2027. godinu planirani iznos rashoda manji je za 4,94 % u odnosu na plan 2026. godine, iz razloga što nisu poznati tekući i kapitalni grantovi od drugih nivoa vlasti.

Zahtjevi budžetskih korisnika u dijelu rashoda po osnovu prihoda od sopstvene djelatnosti (vlastiti prihodi) i namjenskih sredstva uglavnom su uvaženi kroz trogodišnji period.

Imajući u vidu da su zahtjevi budžetskih korisnika bili veći u odnosu na indikativne granice u okviru kojih su se budžetski korisnici trebaju kretati, po najviše iz razloga što JU Centar za socijalni rad Teočak vrši priznavanje statusa roditelja njegovatelja, došlo je do racionalizacije troškova i potrebne opreznosti pri određivanju indikativnih gornjih granica imajući u vidu rizike za period na koji se odnosi Dokument okvirnog Budžeta Općine Teočak, a sve u cilju održavanja ravnoteže prihoda i rashoda i nastojanja da se izbjegne nastanak deficita u budućem periodu.

Radi lakšeg analiziranja kretanja procijenjenih rashoda i izdataka daje se slijedeći pregled indikativnih gornjih granica ukupnih rashoda i izdataka Budžeta Općine Teočak za period 2027.- 2029.godina:

Dokument okvirnog budžeta (DOB) Općine Teočak za period 2027.-2029.godina

Tabela 6.- Rashodi i izdaci

	Plan 2026.	Projekcija 2027.	index (2027/ Plan 2026)	Projekcija 2028.	index (2028/ 2027)	Projekcija 2029.	index (2029/ 2028)
UKUPNO RASHODI I IZDACI	6.887.000,00	3.861.000,00	56,14	3.995.000,00	103,47	4.154.000,00	103,98
-finansirani iz budžeta	2.589.461,00	2.273.986,00	87,82	2.405.476,00	105,78	2.562.864,00	106,54
-finansirani iz namjenskih i vlastitih sredstava, grantova i donacija	4.297.539,00	1.587.014,00	36,92	1.589.524,00	101,58	1.591.136	100,10

Rashodi i izdaci finansirani iz budžeta u 2027. godini predviđaju se u iznosu od 2.273.986,00 KM, što je manje u odnosu na plan 2026. godine za 12,18 %, dok su u 2028. godini veći za 5,78 % u odnosu na projekciju 2027.godine, a u 2029. godini planirani u iznosu od 2.562.864,00 KM, što je za 6,54 % veće u odnosu na projekciju za 2028. godinu.

Projekcije rashoda i izdataka iz namjenskih i vlastitih sredstava, grantova i donacija za 2027. godinu iznose 1.587.014,00 KM, što je za 63,08 % manje od plana 2026. godine, dok su u 2028. godini planirani u iznosu od 1.589.524,00 KM i veći su za 1, 58 % u odnosu na plan za 2027. godinu, a u 2029. godini su planirani neznatno više u odnosu na 2028. godinu.

U tabeli 7. koja slijedi izvršen je prikaz rashoda i izdataka iz budžetskih sredstava po ekonomskim kodovima, te ukupni troškovi po osnovu prihoda od sopstvene djelatnosti, namjenskih sredstava, grantova i donacija:

Tabela 7. - Rashodi, izdaci i finansiranje u Budžetu općine Teočak za periodu 2027.-2029.godina

		Plan 2026.	Projekcija 2027.	index (2026/ Plan 2025)	Projekcija 2028.	index (2028 / 2027)	Projekcija 2029.	index (2029/ 2028)
	UKUPNO RASHODI I IZDACI	6.887.000,00	3.861.000,00	56,06	3.995.000,00	103,47	4.154.000,00	103,98
	I RASHODI I IZDACI IZ BUDŽETSKIH SREDSTAVA (II+IV)	6.887.000,00	3.861.000,00	56,06	3.995.000,00	103,47	4.154.000,00	103,98
	II UKUPNO (A+B+C)	6.842.000,00	3.831.000,00	55,99	3.995.000,00	104,28	4.154.000,00	103,09
600000	A) TEKUĆA REZERVA	10.000,00	10.000,00	100,00	10.000,00	100,00	10.000,00	100,00
610000	B) TEKUĆI IZDACI	2.912.694,00	2.867.414,00	98,45	2.939.624,00	102,52	2.928.794,00	99,63
611000	PLAĆE I NAKNADE TROŠKOVA ZAPOSLENIH	1.552.900,00	1.647.600,00	106,10	1.671.700,00	101,46	1.694.900,00	101,39
611100	Bruto plaće i naknade	1.156.000,00	1.240.300,00	107,29	1.253.500,00	101,64	1.268.200,00	101,17
611200	Naknade troškova zaposlenih	396.900,00	407.300,00	102,62	418.200,00	102,68	426.700,00	102,03

Dokument okvirnog budžeta (DOB) Općine Teočak za period 2027.- 2029.godina

612000	DOPRINOSI POSLODAVCA	63.640,00	67.560,00	106,16	68.370,00	101,20	69.040,00	100,98
612100	Doprinosi poslodavca	63.640,00	67.560,00	106,16	68.370,00	101,20	69.040,00	100,98
613000	UKUPNO IZDACI ZA MATERIJAL I USLUGE	913.194,00	806.494,00	88,32	853.494,00	105,83	818.494,00	95,90
614000	UKUPNO TEKUĆI TRANSFERI	307.960,00	285.760,00	92,79	286.060,00	100,10	286.360,00	100,00
615000	KAPITALNI TRANSFERI	75.000,00	60.000,00	85,71	60.000,00	100,00	60.000,00	100,00
820000	C) UKUPNO KAPITALNI IZDACI	3.919.306,00	953.586,00	24,33	1.045.376,00	109,63	1.215.206,00	116,25
821000	IZDACI ZA NABAVKU STALNIH SREDSTAVA	3.919.306,00	953.586,00	24,33	1.045.376,00	109,63	1.215.206,00	116,25
	IV OTPLATE DUGOVA, GARANCIJE I FINANSIRANJE	45.000,00	30.000,00	66,67	0,00	0,00	0,00	0,00

4.2. Plaće i naknade troškova zaposlenih

Finansiranje plaća, doprinosa zaposlenih i naknada troškova zaposlenih u Općini Teočak i Javnim ustanovama predviđa se iz slijedećih sredstava u narednom trogodišnjem periodu kako slijedi:

**Tabela 8.- Bruto plaće i naknade troškova zaposlenih u Općini Teočak u periodu 2027.-
2029.godina**

	Plan 2026	Projekcija		
		2027.	2028.	2029.
I UKUPNO PLAĆE I DOPRINOSI POSLODAVCA - ekonomski kodovi 611100 i 612100	1.219.640,00	1.307.860,00	1.321.870	1.337.240,00
- iz budžetskih sredstava	1.215.000,00	1.303.000,00	1.317.000,00	1.332.000,00
- iz vlastitih prihoda	4.640,00	4.860,00	4.870,00	5.240,00
II UKUPNO NAKNADE TROŠKOVA ZAPOSLENIH	396.900,00	407.300	418.200,00	426.700,00
- iz budžetskih sredstava	360.000,00	369.000,00	379.000,00	387.000,00
- iz vlastitih prihoda	36.900,00	38.300,00	39.200,00	39.700,00
UKUPNO PLAĆE I NAKNADE (I + II)	1.616.540,00	1.715.160,00	1.740.070,00	1.763.940,00

Dokument okvirnog budžeta (DOB) Općine Teočak za period 2027.- 2029.godina

Ukupno predviđena izdvajanja za bruto plaće, doprinose poslodavca i naknade troškova zaposlenih iz budžetskih i vlastitih sredstava za 2027. godinu iznose ukupno 1.715.160,00 KM, što je za 6,10% više u odnosu na plan 2026. godine, te ostaju na približnom nivou u 2028. i 2029. godini.

U okviru ovih sredstava, bruto plaće su uvećane po osnovu radnog staža (minuli rad).

Dokument okvirnog budžeta (DOB) Općine Teočak za period 2027.-2029.godina

Poglavlje 5 - Budžetski prioriteti za period 2027.- 2029. godina

Osnovna funkcija DOB-a Općine Teočak za period 2027.-2029. godina, je da, pored osiguranja fiskalne discipline budžetskih korisnika, osigura alokaciju budžetskih sredstava. Srednjoročne projekcije prihoda za period 2027.-2029. godina prate pozitivne makroekonomske prognoze za navedeni period, ali istovremeno zadržavajući određeni nivo opreznosti i konzervativnosti u procjenama. Projekcije su usko vezane za pretpostavljenu brzinu oporavka ekonomije u postpandemijskom periodu, ali i sa najnovijim negativnim dešavanjima u Ukrajini i Bliskom istoku, koja su se odrazila na cjelokupnu ekonomiju. Obzirom na krajnju nepredvidivost mogućih budućih šokova, posebno kada je riječ o stanju inflacije, moguće su značajne promjene u krajnjem ishodu makroekonomskih pretpostavki, pa tako i projekcija javnih prihoda.

Prilikom određivanja gornjih granica rashoda krajnje se oprezno pristupilo planiranju budžeta vodeći se budžetskim principima uravnoteženosti i ekonomičnosti, imajući u vidu da svaki neplanirani događaj u drugoj polovini 2026. godine može u značajnijoj mjeri uticati na projekcije javnih prihoda i eventualno dovesti do vanrednog revidiranja trenutnih projekcija te ugroziti ravnotežu budžeta na svim nivoima vlasti, samim tim i lokalnom.

Stoga je neophodno nastaviti mjere štednje i smanjenje potrošnje iz općinskog budžeta planiranih za razdoblje 2027.- 2029. godina na većini glavnih kategorija rashoda, obzirom da je cilj izrade Dokumenta okvirnog budžeta kreiranje kvalitetnijeg strateškog osnova za srednjoročno planiranje budžeta i pripremu godišnjih budžeta, kroz povezivanje trogodišnjih projekcija rashoda. Imajući ovo u vidu, utvrđeni prioriteti bili su polazna osnova kod donošenja odluka o predloženim prioritetima potrošnje, a u skladu s tim i budžetskim ograničenjima za naredni trogodišnji period. Prijedlozi prioriteta potrošnje i početnih gornjih granica rashoda iskazanih u tabelarnom dijelu DOB za period 2027.-2029. godine utvrđeni su na osnovu sljedećih elemenata: utvrđenim prioritetima Općine Teočak, fiskalne politike Općine Teočak i okvira raspoloživih sredstava i dostavljenih finansijskih zahtjeva budžetskih korisnika.

Općina Teočak, vođena uvjerenjem da strateško planiranje predstavlja ključni instrument za proaktivno i odgovorno upravljanje lokalnim razvojem, u narednom periodu će inicirati izradu Strategije razvoja Općine Teočak. Za potrebe izrade Strategije razvoja Općina će formirati Razvojni tim koji će utvrditi pravce razvoja Općine Teočak u pomenutom periodu.

Vodeći principi na kojima će se zasnivati proces izrade Strategije razvoja je kvalitet života građana, održivost ekonomije, održivost okoliša i socijalna uključenost. Održivost, kao princip, integrira ekonomski i okolišni aspekt, dok princip socijalne uključenosti podrazumijeva jednake šanse za sve i pravičnost u smislu identificiranja potreba i interesa marginaliziranih i socijalno isključenih grupa stanovništva.

U skladu sa članom 18. Zakona o budžetima u Federaciji Bosne i Hercegovine („Sl.novine Federacije BiH“, br. 102/13, 9/14, 13/14, 8/15, 91/15, 102/15, 104/16, 5/18, 11/19, 99/19, 25a/22 i 7/25) nakon usvajanja od strane Općinskog načelnika, ovaj dokument bit će objavljen na web stranici Općine Teočak i dostavljen Općinskom vijeću Teočak u vidu informacije.

OPĆINSKI NAČELNIK
Tajib Muminović s.r.